0.0.1 mahāpadesadesanāsuttam

- ekam samayam bhagavā bhoganagare viharati ānandacetiye. tatra kho bhagavā bhikkhu āmantesi bhikkhavoti. bhadanteti te bhikkhu bhagavato paccassosum. bhagavā etadavoca:
- 2. cattārome bhikkhave mahāpadese desessāmi. tam suņātha sādhukam manasi karotha bhāsissāmīti. evam bhanteti kho te bhikkhu bhagavato paccassosum. bhagavā etadavoca: katame ca bhikkhave cattāro mahāpadesā?
- 3. idha bhikkhave bhikkhu evam vadeyya: "sammukhā metam āvuso bhagavato sutam sammukhā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam. na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni tāni ce sutte otāriyamānāni vinaye sandassiyamānāni na ceva sutte otaranti na vinaye sandissanti, niṭṭhamettha gantabbam: addhā idam na ceva tassa bhagavato vacanam arahato sammāsambuddhassa. imassa ca bhikkhuno duggahītanti iti idam bhikkhave chaḍdheyyātha.
- **4.** idha pana bhikkhave bhikkhu evam vadeyya: "sammukhā metam āvuso bhagavato sutam sammukhā pa-

tiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni. tāni ce sutte otāriyamānāni vinaye sandassiyamānāni ceva sutte otaranti vinaye ca sandissanti, niṭṭhamettha gantabbam: addhā idam tassa bhagavato vacanam arahato sammāsambuddhassa. imassa ca bhikkhuno suggahītanti. imam bhikkhave paṭhamam mahāpadesam dhāreyyātha.

5. idha pana bhikkhave bhikkhu evam vadeyya: "amu-kasmim nāma āvāse saṅgho viharati sathero sapāmok-kho. tassa me saṅghassa sammukhā sutam sammu-khā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam. na paṭikkositabbam. ana-bhinanditvā appaṭikkositvā tāni padabyañjanāni. sā-dhukam uggahetvā sutte otāretabbāni. vinaye san-dassetabbāni. tāni ce sutte otāriyamānāni vinaye san-dassiyamānāni na ceva sutte otaranti, na vinaye san-dissanti, niṭṭhamettha gantabbam: addhā idam na ceva tassa bhagavato vacanam arahato sammāsambuddhassa tassa ca saṅghassa duggahītanti. iti hidam¹. bhik-khave chaḍḍheyyātha.

bjt page 328

¹itihetaṃ - machasaṃ.

pts page 169

- 6. idha pana bhikkhave bhikkhu evam vadeyya: "amukasmim nāma āvāse saṅgho viharati sathero sapāmokkho. tassa me saṅghassa sammukhā sutam sammukhā paṭiggahītam ayam dhammo ayam vinayo idam satthusāsananti". tassa bhikkhave bhikkhuno bhāsitam neva abhinanditabbam. na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni. tāni ce sutte otāriyamānāni vinaye sandassiyamānāni sutte ceva otaranti, vinaye ca sandissanti, niṭṭhamettha gantabbam: addhā idam tassa bhagavato vacanam arahato sammāsambuddhassa. tassa ca saṅghassa suggahītanti. idam bhikkhave dutiyam mahāpadesam dhāreyyātha.
- 7. idha pana bhikkhave bhikkhu evam vadeyya: "amukasmim nāma āvāse sambahulā therā bhikkhū viharanti bahussutā āgatāgamā dhammadharā vinayadharā mātikādharā. tesam me therānam sammukhā sutam sammukhā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam. na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni. tāni ce sutte otāriyamānāni vinaye sandassiyamānāni na ceva sutte otaranti, na vinaye sandissanti, niṭṭhamettha gantabbam: addhā idam na ceva tassa bhagavato vacanam arahato sammāsambuddhassa. tesañca therānam duggahītanti. iti hidam bhikkhave

chaddheyyatha.

- 8. idha pana bhikkhave bhikkhu evam vadeyya: "amukasmim nāma āvāse sambahulā therā bhikkhu viharanti bahussutā āgatāgamā dhammadharā vinayadharā mātikādharā tesam. me therānam sammukhā sutam sammukhā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni. tāni ce sutte otāriyamānāni vinaye sandassiyamānāni sutte ceva otaranti, vinaye ca sandissanti, niṭṭhamettha gantabbam: 'addhā idam tassa bhagavato vacanam arahato sammāsambuddhassa. tesañca therānam suggahīta' nti. idam bhikkhave tatiyam mahāpadesam dhāreyyātha.
- 9. idha pana bhikkhave bhikkhu evam vadeyya: "amukasmim nāma āvāse eko thero bhikkhu viharati bahussuto āgatāgamo dhammadharo vinayadharo mātikādharo. tassa me therassa sammukhā sutam sammukhā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam. na paṭikkositabbam. anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandasetabbāni. tāni ce sutte otāriyamānāni vinaye sandas

siyamānāni na ceva sutte otaranti, na vinaye sandissanti, niṭṭhamettha gantabbaṃ: 'addhā idaṃ na ceva tassa bhagavato vacanaṃ arahato sammāsambuddhassa. tassa ca therassa duggahīta' nti. iti hidaṃ bhikkhave chaḍḍheyyātha.

10. idha pana bhikkhave bhikkhu evam vadeyya: "amukasmim nāma āvāse eko thero bhikkhu viharati bahussuto āgatāgamo dhammadharo vinayadharo mātikādharo. tassa me therassa sammukhā sutam sammukhā paṭiggahītam ayam dhammo ayam vinayo idam satthusāsana" nti. tassa bhikkhave bhikkhuno bhāsitam neva abhinanditabbam. na paṭikkositabbam anabhinanditvā appaṭikkositvā tāni padabyañjanāni sādhukam uggahetvā sutte otāretabbāni. vinaye sandassetabbāni tāni ce sutte otāriyamānāni vinaye sandassiyamānāni sutte ceva otaranti, vinaye ca sandissanti, niṭṭhamettha gantabbam: "addhā idam tassa bhagavato vacanam arahato sammāsambuddhassa, tassa ca therassa sugahīta" nti. idam bhikkhave catuttham mahāpadesam dhāreyyātha.

11. ime kho bhikkhave cattāro mahāpadesāti.